

ATURAN URUSAN MESYUARAT

HARI ISNIN, 20HB APRIL, 1981, PUKUL 2.30 PETANG

B1. 6

1

PERTANYAAN-PERTANYAAN BAGI JAWAB MULUT

- *1. **Puan Hasanah binti Mohd. Kassim** minta Menteri Kesihatan menyatakan bilakah akan disiapkan Bangunan Hospital Besar, Kuala Trengganu; dan adakah Kementerian sedar bahawa setengah daripada wad-wad yang ada sekarang adalah dari bangunan lama yang tidak sesuai lagi untuk menempatkan pesakit-pesakit yang kian hari kian bertambah untuk mendapatkan rawatan.
- *2. **Tuan Haji Abdul Hamid bin Tahir** minta Menteri Pelajaran menyatakan sama ada guru-guru khas yang mengajar orang cacat ini telah mendapat latihan yang cukup dan daripada mereka berapakah yang mendapat latihan khas di luar negeri.
- *3. **Dato G. Pasamanickam** minta Perdana Menteri memberitahu bilakah kekosongan jawatan Pengerusi, Lembaga Perpaduan Negara akan diisi dan sama ada telah ada seorang calon yang sesuai untuk mengisi kekosongan tersebut.
- *4. **Datuk Hajjah Fatimah binti Haji Salim** minta Menteri Pelajaran menyatakan jumlah wang yang terlibat dalam rancangan buku-buku teks di seluruh negara dan sama ada beliau akan terus meminjamkan buku-buku ini kepada semua murid-murid memandangkan bahawa setengah daripada buku-buku tersebut tidak dapat dibeli sama ada di kedai-kedai mahu pun di Dewan Bahasa Pustaka sendiri.
- *5. **Tuan Loh Kee Peng** minta Menteri Pengangkutan menyatakan apakah langkah yang telah diambil oleh Kementerian beliau untuk menggalakkan lebih banyak kapal-kapal besar untuk menggunakan perkhidmatan Jeti di Tanjung Kling, Melaka yang telahpun siap dan dibuka kepada pengangkutan laut.
- *6. **Tuan Alexander Lee** minta Menteri Tenaga, Telekom dan Pos menyatakan memandangkan kos pengeluaran petroleum yang diimport meningkat yang berkecenderungan untuk menaikkan kadar inflasi dan kadar perbelanjaan hidup dalam negara, sama ada Kerajaan akan menggalakkan penggunaan sumber-sumber tenaga gantian seperti kuasa air, angin, solar, arang-batu, gas, biogas, kuasa nuklear dan gelombang untuk kedua-dua sektor awam dan swasta.
- *7. **Tuan Ibrahim bin Salleh** minta Menteri Hal Ehwal Dalam Negeri menyatakan sama ada kerajaan akan mendirikan Bangunan Imigresen di Raub; dan sama ada beliau sedar bahawa pegawai-pegawai dan kakitangan di Imigresen Raub tidak mencukupi; jika sedar apakah tindakan beliau akan ambil untuk mengatasi masalah ini.
- *8. **Tuan Ismail bin Hashim** minta Menteri Hal Ehwal Dalam Negeri menyatakan:
- (a) jumlah penagih-penagih dadah yang terdapat di Semenanjung Malaysia, Sabah dan Sarawak sehingga 31hb Disember, 1980; dan
- (b) sejauh manakah penagih-penagih dadah ini dapat dipulihkan semula.

***9. Datuk Haji Mahmoud Salim bin Haji Mohamad** minta Menteri Pelajaran menyatakan sama ada benar atau tidak bahawa jenis dan mutu makanan dan minuman yang diberikan kepada murid di dalam Rancangan Makanan tambahan adalah berbeza di antara satu negeri dengan satu negeri yang lain dan nyatakan juga kategori murid-murid yang boleh diberikan dengan percuma makanan sahaja atau minuman susu sahaja.

***10. Puan Hajjah Salmah binti Sheikh Hussain** minta Menteri Pelajaran menyatakan langkah-langkah yang telah diambil terhadap kemerosotan akhlak di kalangan pelajar-pelajar kita.

***11. Tuan S. Subramaniam** minta Menteri Perumahan dan Kerajaan Tempatan menyatakan sama ada beliau akan mengecualikan Koperasi-koperasi dari Akta Pajak Gadaai (Pawn Brokers Act) untuk membenarkan Koperasi-koperasi mengambil bahagian dalam perniagaan ini dengan tujuan membantu ahli-ahli yang berpendapatan rendah.

***12. Tuan K. Kumaran** minta Menteri Perusahaan Awam menyatakan sama ada tindakan mahkamah diambil terhadap peminjam-peminjam yang tidak membayar balik pinjaman daripada MARA, jika ya, nyatakan jumlah orang dan wang yang terlibat.

***13. Tuan Abdul Razak bin Haji Abu Samah** minta Menteri Tenaga, Telekom dan Pos menyatakan langkah-langkah beliau akan ambil untuk mengelakkan daripada berlaku kemalangan jiwa sebagaimana yang terjadi kepada empat orang pekerja telekom di Batu 7, Batu Cave pada 18.3.1981 dan apakah bantuan yang telah diberikan kepada keluarga mangsa-mangsa tersebut.

***14. Tuan S. I. Rajah** minta Menteri Pelajaran menyatakan sama ada Kementerian akan mengadakan sebuah pusat Penuntut Malaysia yang berpatutan besarnya di Madras, India dan mengapa seorang Pegawai Kebajikan Penuntut tidak dilantik untuk bertugas di New Delhi atau pun di Madras.

***15. Tuan V. V. Aboo** minta Perdana Menteri menyatakan adakah beliau berpuashati dengan penyertaan dan kerjasama rakyat di dalam projek-projek pembangunan yang dianjurkan oleh Kerajaan yang meliputi segala bidang dan adakah sebarang cadangan atau rancangan untuk menggalakkan rakyat memberi kerjasama atau menyertai projek-projek yang dilaksanakan oleh Kerajaan.

***16. Tuan Haji Abdul Hamid bin Tahir** minta Menteri Perdagangan dan Perindustrian menyatakan berapa banyakkah kelulusan yang telah diberi kepada pengusaha-pengusaha kilang simen untuk mengusahakannya di negara kita dan di mana tempat-tempatnya dan berapa buah di antaranya yang telah memulakan pengusahaannya dan di mana.

***17. Tuan Haji Ibrahim bin Abdullah** minta Menteri Buruh dan Tenaga Rakyat menyatakan :

- (a) jumlah buruh dalam negara mengikut kaum sehingga awal tahun 1980; dan
- (b) sama ada benar bilangan buruh wanita pada masa ini melebihi bilangan buruh lelaki dan jika ya, sama ada Kerajaan ada rancangan untuk mengurangkan pengambilan buruh wanita untuk memberi peluang kepada buruh lelaki.

***18. Tuan Syed Kamarulzaman bin Syed Bahaldin** minta Menteri Perdagangan dan Perindustrian menyatakan sama ada persiapan dan persediaan yang dibuat oleh Kerajaan adalah cukup, dan sikap rakyat ditinjau dan diyakini, sejak beberapa tahun ini ke arah pemakaian sistem METRIK supaya rakyat tidak akan ragu-ragu menggunakannya dalam tahun 1982.

***19. Dr Choo Kooi Fook** minta Perdana Menteri menyatakan sama ada beliau ada rancangan untuk membubarkan segala rancangan perancang keluarga di negara ini memandangkan bahawa peratusan pertumbuhan penduduk telah turun dari 3% ke 2.7%.

***20. Tuan M. Mahalingam** minta Menteri Kebudayaan, Belia dan Sukan menyatakan apakah langkah-langkah yang diambil oleh pihak Kementerian untuk mewujudkan integriti di kalangan belia-belia di Malaysia dengan mengadakan berbagai aktiviti, kemudahan dan bantuan agar membentuk kematangan dan kerohanian yang sihat dan berdisiplin.

***21. Tuan Abdullah bin Salleh** minta Menteri Pertahanan menyatakan mengenai kemalangan Jet Tebuan yang membunuh pelatih juruterbang Lt. Muda (U) Mohd. Razif bin Abdullah di Laut Cina Selatan baru-baru ini, sama ada ia merupakan kemalangan "biasa" atau kemalangan yang disebabkan oleh Jet Tebuan yang digunakan oleh tentera udara itu sebenarnya sudah lama dan tidak boleh digunakan lagi.

***22. Dato G. Pasamanickam** minta Menteri Hal Ehwal Dalam Negeri memberitahu sama ada beliau bercadang untuk melonggarkan lagi syarat wajib lulus dalam Bahasa Malaysia untuk calon-calon yang menghadiri temuduga kerana memandangkan setengah pemohon-pemohon yang memohon kewarganegaraan terdiri daripada mereka yang buta huruf dan bekerja sebagai buruh dan sebagainya dan mereka ini tidak dapat menjawab dengan fasih dalam Bahasa Malaysia.

***23. Datuk Hajjah Fatimah binti Haji Salim** minta Menteri Pengangkutan menyatakan sama ada beliau sedar bahawa lori-lori balak biasa mendapat kemalangan di mana kayu-kayu balak tersebut jatuh dari muatan lori tersebut dan jika sedar sama ada beliau akan mengarahkan atau membuat undang-undang supaya lori-lori balak hendaklah menggunakan wayar besi (wire rope) dan tidak rantai besi sahaja seperti yang ada sekarang.

***24. Tuan Alexander Lee** minta Menteri Tenaga, Telekom dan Pos menyatakan memandangkan usaha-usaha Kerajaan untuk menjimat tenaga apakah langkah-langkah yang akan diambil untuk menjimatkan penggunaan tenaga oleh sektor awam dan apakah langkah-langkah yang sedang diambil untuk mendidik dan menggalakkan cara-cara menjimatkan tenaga bagi sektor swasta termasuk perindustrian, perdagangan dan pengguna-pengguna "residential".

***25. Tuan Ismail bin Hashim** minta Menteri Hal Ehwal Dalam Negeri menyatakan bilangan pusat-pusat pemulihan dadah yang ada di negara ini.

***26. Datuk Haji Mahmoud Salim bin Haji Mohamad** minta Menteri Pelajaran menyatakan bantuan yang diperuntukkan kepada tiap-tiap negeri di Semenanjung Malaysia untuk Projek Makanan Tambahan ke sekolah-sekolah dalam tahun 1980 dan bilangan sekolah dan jumlah murid-murid yang menerima bantuan dan nyatakan juga rancangan bantuan untuk tahun 1981 ini.

***27. Puan Hajjah Salmah binti Sheikh Hussain** minta Menteri Perumahan dan Kerajaan Tempatan menyatakan bilangan bandar-bandar baru yang akan didirikan serta kemudahan-kemudahan yang akan diadakan di bandar-bandar baru tersebut di bawah Dasar Ekonomi Baru.

***28. Tuan Tan Chang Soong** minta Menteri Pelajaran menyatakan bilangan maktab-maktab latihan guru dalam negara dan bilangan pelatih-pelatih mengikut bangsa bagi tempoh 1975-1981 dan angka pengeluaran guru-guru terlatih untuk tempoh yang sama.

***29. Tuan K. Kumaran** minta Menteri Kewangan menyatakan:

- (a) jumlah kedai tuak (toddy) Kerajaan di negara ini;
- (b) langkah yang diambil oleh Kerajaan untuk menubuhkan lebih banyak lagi kedai tuak; dan
- (c) sama ada Kerajaan akan membenarkan dibawa balik untuk diminum di mana-mana sahaja.

***30. Tuan Abdul Razak bin Haji Abu Samah** minta Menteri Pengangkutan menyatakan langkah-langkah yang diambil oleh beliau bagi mengelakkan kemalangan tergilis oleh keretapi memandangkan ramainya penduduk yang tinggal berhampiran dengan landasan keretapi dan apakah jenis bantuan yang telah diberikan kepada mangsa-mangsa kemalangan ini.

***31. Tuan V. V. Aboo** minta Menteri Perumahan dan Kerajaan Tempatan menyatakan jumlah bilangan pemaju-pemaju perumahan Bumiputra yang diberi lesen; dan memandangkan bahawa kebanyakan kaum Bumiputra adalah kurang dari segi kemudahan-kemudahan kewangan dan kemahiran untuk memasuki lapangan perniagaan, ini nyatakan bentuk bantuan yang diberikan oleh Kementerian kepada mereka.

***32. Tuan Haji Ibrahim bin Abdullah** minta Menteri Pertanian menyatakan sebab-sebab mengapa banyak tanah di seluruh negara yang terbiar dan nyatakan luas tanah yang terbiar ini dan di negeri mana.

***33. Dr Choo Kooi Fook** minta Menteri Pelajaran menyatakan:

- (a) jumlah bilangan dan pecahan mengikut kaum, pelajar Malaysia yang mendapat biasiswa Kerajaan di Institusi Pelajaran Tinggi di seberang laut untuk tahun 1980 di peringkat Pra Universiti, Diploma, Universiti dan di peringkat lepas siswazah; dan
- (b) nyatakan jumlah perbelanjaan untuk penuntut-penuntut ini.

***34. Tuan Haji Ariffin Salleh** minta Perdana Menteri menyatakan berapa peratuskah jawatan-jawatan dalam semua peringkat telah diisi dalam "GERAKAN ISI PENUH" yang dilancarkan tidak lama dahulu dan berapa ramai yang telah memohon.

***35. Dato Haji Mohd. Nor Mohamad** minta Menteri Kewangan menyatakan mengapa Pasaran Saham Kuala Lumpur dibiarkan menjadi tempat berjudi dan mengadu untung dengan cara menjual beli kosong (short) dan menggunakan "wang hangat" kerana ini tentu menakutkan dan merugikan penanam modal yang tulin dan syarikat-syarikat yang betul-betul mencari modal untuk perkembangan aktiviti-aktiviti mereka berpandukan kepada dasar ekonomi baru.

ATURAN URUSAN MESYUARAT DAN PEMBERITAHU USUL

1. Usul dibuat oleh Menteri Kewangan dan Masalah dicadangkan:

Bahawa Dewan ini,
mengambil perhatian atas kemajuan dan kejayaan yang telah dicapai dalam pelaksanaan Dasar Ekonomi Baru dalam tempoh 10 tahun yang lalu;

bersetuju dengan usaha-usaha Kerajaan seterusnya untuk mencapai tujuan utama perpaduan negara melalui pembasmian kemiskinan tanpa mengira kaum dan penyusunan semula masyarakat Malaysia serta memperkukuhkan lagi ketahanan negara;

meluluskan Rancangan Malaysia Keempat yang telah dirangka dengan teliti untuk memenuhi cita-cita dan hasrat negara berasaskan kepada matlamat Dasar Ekonomi Baru melalui pelaksanaan usaha-usaha dan program-program pembangunan seperti yang dibentangkan dalam Kertas Perintah No. 10/81; dan

seterusnya *menyeru* semua rakyat Malaysia dari semua lapisan supaya terus meningkatkan usaha dan sumbangan mereka untuk membentuk satu Negara yang bersatupadu, saksama, maju, kukuh dan aman damai selaras dengan objektif Rukunegara.

Menyambung semula Perbahasan Atas Masalah (17hb April, 1981)

2.	(DR 9/81) Rang Undang-undang Perlembagaan (Pindaan)	Bacaan Kali Yang Kedua
3.	(DR 7/81) Rang Undang-undang Perbekalan Tambahan (1979 dan 1980)	"
4.	(DR 8/81) Rang Undang-undang Pertubuhan (Pindaan) ...	"
5.	(DR 1/81) Rang Undang-undang Tanah (Kawasan Penempatan Berkelompok) (Pindaan) ...	"
6.	(DR 3/81) Rang Undang-undang Kanun Tanah Negara (Pindaan)	"
7.	(DR 5/81) Rang Undang-undang Lembaga Kemajuan (Pindaan)	"
8.	(DR 6/81) Rang Undang-undang Lembaga Kemajuan Wilayah Kedah	"
9.	(DR 2/81) Rang Undang-undang Polis (Pindaan) ...	"
10.	(DR 4/81) Rang Undang-undang Kanak-kanak dan Orang Muda (Pindaan)	"